

November
2010Posbus 20
Hermanus 7200

	Telefoon	Faks
Hermanus	028 313 8000	028 312 1894
Gansbaai	028 384 8300	028 384 0241
Kleinmond	028 271 8400	028 271 4100
Stanford	028 341 8500	028 341 0445

24 Uur Beheerkamer Brandweer	028 313 8000/8111 028 312 2400
---------------------------------	-----------------------------------

Bulletin

Amptelike nuusbrieff van Munisipaliteit Overstrand

EERSTE VROU WIL GEMEENSAP MET LIEFDE EN BEGRIP DIEN BOTHAGUTHRIE IN BURGEMEESTERSTOEL

Rdl Nicolette Botha-Guthrie het op 7 Oktober 2010 die burgemeesterstoel in Overstrand amptelik ingeneem nadat sy tydens 'n spesiale raadsvergadering op Hermanus tot dié amp verkies is.

Botha-Guthrie is reeds 'n ruk gelede as die Demokratiese Alliansie se kandidaat vir dié pos aangewys nadat dit bekend geword het dat die voormalige uitvoerende burgemeester, mnr Theo Beyleveldt, 'n Parlementêre aanstelling in die Nasionale Raad van Provinsies aanvaar het.

Sy kon hom egter nie direk opvolg nie omdat sy Beyleveldt ook as proporsionele raadslid vervang het en die proses eers deur die Verkiezingskommissie afgehandel moes word. In die tussentyd het mnr Ben Solomon as burgemeester gedien.

By die spesiale raadsvergadering is twee kandidate vir die pos van uitvoerende burgemeester genomineer en Botha-Guthrie het die kandidaat van die ANC, mnr Jan Gelderblom, met 11 stemme teen ses verslaan.

Botha-Guthrie het in haar inhuldigingsrede aangekondig dat sy die Burgemeesterskomitee onveranderd gaan laat met Onderburgemeester Pieter Scholtz verantwoordelik vir infrastruktuur, beplanning en ekonomiese ontwikkeling, Ben Solomon vir finansies en bestuursdienste en Philippus Appelgrein vir gemeenskap- en beskermingsdienste.

Sy het Beyleveldt geloof vir die uiters goed bestuurde munisipaliteit wat sy oorneem en gesê die monument vir sy en sy raad se leierskap is oor die hele gebied te sien in die vorm van infrastruktuur en in die handhawing van uitmuntende dienslewering. Hoewel dit moeilik is om



Nicolette Botha-Guthrie

daarop te verbeter, is dit vir haar 'n uitdaging om 'n eie stempel daarop te plaas.

Voorts het sy haar waardering betuig aan Marianné Beyleveldt vir die wyse waarop sy saam met haar man maatskaplike probleme met toewyding, liefde en harde werk aangedurf het.

Botha-Guthrie het onderneem om saam met haar man, Mark Guthrie, die Overstrand-gemeenskap met liefde, begrip en toewyding te dien. Sy is ten volle bewus van die

verantwoordelikheid op haar skouers tot en met die volgende munisipale verkiesing, wat na verwagting in Mei 2011 sal plaasvind.

Sy het gesê sy sal sterk steun op die kundigheid van haar raad en die munisipale bestuursplan, 'n deelneemende bestuurstyl volg, 'n oopdeurbeleid handhaaf en altyd eerlik wees in haar antwoorde, al sal dit soms nie populêr wees nie.

Haar strewes is om sover moontlik die gemeenskappe van Overstrand nader aan mekaar en aan gemeenskaplike doelstellings te bring. Die mense van Overstrand verdien die beste en sy sal haar beste gee.

Botha-Guthrie is in 1948 op Darling in die Wes-Kaap gebore en het in 1965 aan die Hoër Handelskool Paarl gematrikuleer. Haar verdere studies was aan die Kaapse Technikon en RAU, terwyl sy ook opleiding by Nasionale Intelligensie en Buitelandse Sake deurloop het.

In haar loopbaan was sy by die Sagtevrugteraad, die bankwese en Nasionale Intelligensie betrokke en het ook na haar uitrede 'n binnenshuise versieringsonderneming bedryf.

Haar politieke betrokkenheid het in 2000 begin toe sy as raadslid van Overstrand verkies is. In 2006 het sy 'n regstreeks verkose raadslid van die Overbergse Distriksmunisipaliteit geword en in 'n stadium drie maande lank as burgemeester gedien.

Sy doen baie gemeenskapswerk, veral by KANSA, Sofca en Fynbosspark-aftreeoord. Botha-Guthrie het 'n gesonde belangstelling in die kunste, veral teater en opera. Sy lees graag en hou van kook en tuinmaak.

SLEUTELSEREMONIE 'N MYLPAAL VIR KLEINMOND

Kleinmond se laekoste-behuisingsprojek het 'n belangrike mylpaal behaal met die eerste 32 huise wat voltooi en gereed is vir oorhandiging aan hul nuwe eienaars wat sal kan intrek sodra die papierwerk afgehandel is.

Op Maandag 27 September 2010 het die Wes-Kaapse LUR vir Behuising, mnr Bonginkosi Madikezela, ter ere van hierdie geleentheid simbolies sleutels aan die twee begunstigdes bo-aan die lys oorhandig, net bietjie meer as 10 maande nadat hy die eerste sooi vir hierdie projek gespit het.

By voltooiing sal hierdie R75-miljoenprojek van 410 huise nie net die tekort aan behuising vir die minder bevoorregtes grootliks verlig nie, maar daar is ook besondere sorg daaraan bestee om die impak van hierdie projek op die omgewing en die gemeenskap te versag. Byna die helfte van die aansoekers op Kleinmond se behuisinglys sal dan geholpe wees.

Hulle lang wag sal beloon word met



Thshapo Bonivas Setlomboko ontvang die sleutels van sy huis en 'n burgemeesterlike woord van advies.

vakmanskap van hoë gehalte, 'n ruimer huis en ander eenmalige voordele wat toe te skryf is aan die betrokkenheid van die WNNR en die Departement van Wetenskap en Tegnologie.

Vir die uitredende Burgemeester van Overstrand, rdl Theo Beyleveldt, was dit 'n spesiale geleentheid. In sy termyn sedert

2006 is heelwat vordering daarmee gemaak om aandag te skenk aan die infrastruktuurbehoefes van hierdie kusunisipaliteit wat in een van die belangrikste groeipunte van die Wes-Kaap verander het nadat dit vir heeltemal té lank net 'n area met stil strandoorde was. Behuising het agterweë gebly weens uitgerekte Hoër-

hofsake rakende die toekenning van 'n tender, maar deur sy intervensie kon daar uiteindelik voortgegaan word met behuisingprojekte op Stanford, Kleinmond en Bettiesbaai.

Hy het onlangs aangekondig dat daar binnekort met 'n groot behuisingprojek in Zwelihle begin sal word sedert grond vir laekoste- en maatskaplike (gap) behuising danksy 'n ontwikkelingsfasiliteringsooreenkoms met 'n maatskappy in die private sektor beskikbaar gestel is.

In Kleinmond, het Munisipaliteit Overstrand van sy wetenskaplike beoordelingstelsel gebruik gemaak om potensiële begunstigdes te prioritiseer en om te verseker dat daardie aansoekers met die grootste behoefte eerste gehelp word. Hierdie toets word gegrond op die sosio-ekonomiese status van aansoekers en die inligting wat hiervoor gebruik word, word uit die munisipaliteit se aansoekvorms vir die waglyk verkry.

WEN-VENNOOTSAP BRING BETER WATER

'n Wenvennootskap tussen die Munisipaliteit Overstrand en 'n privaattontwikkelaar hou vir die Pearly Beach-gemeenskap groot voordele in sover dit waterkwaliteit en die langtermynvoorsiening van water betref.

Die nuwe R7 miljoen Pearly Beach-watersuiweringaanleg is op Woensdag 15 September amptelik deur die Uitvoerende Burgemeester, mnr Theo Beyleveldt, in gebruik gestel wat vir die laaste keer in hierdie kapasiteit op Gansbaai opgetree het.

Die munisipaliteit het R2,7 miljoen tot die ontwikkelingskoste van die aanleg bygedra, terwyl PSP Eiendomme, eienaars van die Pearly Beach-woonweparkontwikkeling, die res van die koste bygedra het. Die aanleg is geleë op 'n serwituit op die plaas Kleyn Hagelkraal en die volle bedryf en instandhouding daarvan is aan die munisipaliteit oorhandig.

Dié samewerkingseleentheid is deur die raadgevende ingenieursfirma BKS (Edms) Bpk raakgesien toe hulle deur die eienaars van die Pearly Beach-woonweparkontwikkeling aangestel is om 'n watersuiweringfasiliteit te ontwikkel en besef het dat die Munisipaliteit Overstrand terselfdertyd besig was met 'n ondersoek na die opgradering van die dorpsgebied se watersuiweringwerke.

Na 'n deeglike koste-analise en met in agneming van waterkwaliteitsvereistes en ander oorwegings ten opsigte van die bedryf en instandhouding van so 'n aanleg, het albei partye ingestem om 'n enkele watersuiweringaanleg vir sowel die dorp as die woonweparkontwikkeling te bou.

Onder die voordele hiervan is dat hoë waterverliese uitgeskakel, bedryf- en instandhoudingskoste verlaag en beter tegnologie benut kan word. Dit sou ook moontlik wees om die grondslag te lê vir die uitbreiding van kapasiteit, wat tans 1440 kl per dag is maar op 2360 kl per dag bereken

word wanneer Pearly Beach ten volle ontwikkel is.

Ultrafiltrasiemembrane, 'n moderne en bewese tegnologie vir die behandeling van gekleurde, brak- en seewater, word in die aanleg gebruik omdat dit groot voordele vir die omgewing en bedryf- en instandhoudingskoste inhou. Die oppervlak wat die aanleg beslaan, is kleiner as by 'n konvensionele suiweringswerke en minder flokkulante en chemikalieë word vereis. Die personeel-inset vir so 'n aanleg is ook veel kleiner.

Konstruksiewerk aan die aanleg het in Februarie begin en is in Augustus voltooi. Mnr Henk Aartsma van BKS was die projekbestuurder. AVDM Raadgevende Ingenieurs het die siviele werke gemoniteer. Die meganiese kontrakteur was Quality Filtrations Systems en Burmar Civils het die siviele werk gedoen. Adenco was die elektriese kontrakteur en Spectrum het die telemetriestelsel geïnstalleer.

Die Burgemeester het gesê die nuwe infrastruktuur imponeer hom en hy is trots op die ingenieurspan wat alles bymekaar gesit het. Die munisipaliteit het die afgelope paar jaar baie geld aan infrastruktuurprojekte in die Gansbaai-gebied bestee om die kwaliteit van lewe te verbeter.

Met meer as R740 miljoen wat in die huidige raad se termyn hoofsaaklik uit eie fondse op kapitaalprojekte bestee is, is dit vir hom verblydend om steeds te kan sê dat die impak op lewenskoste hanteerbaar was. 'n Onlangse opname het getoon dat Overstrand-inwoners se munisipale rekeninge steeds laer is as dié van vergelykbare dorpe se inwoners.

Rdl Pieter Scholtz het mnr Beyleveldt bedank vir sy belangstelling in en aandag aan Gansbaai-aangeleenthede en hom sterkte en sukses toegewens vir sy toekomstige rol in die Nasionale Raad van Provinsies.



Jan Koekemoer van PSP Eiendomme kyk hoe Theo Beyleveldt die lint by die Pearly Beach watersuiweringaanleg knip.

MORELESTANDAARDE-INISIATIEF



Verantwoordelikheid

Ons fokus vanjaar veral op drie waardes: omgee, respek en verantwoordelikheid. As ons almal in Overstrand en omgewing hierdie drie waardes in ons lewe aanvaar, sal dit 'n reuseverskil maak.

Verantwoordelikheid beteken dat ek omgee vir die gemeenskap waarin ek woon. Hulle belange is ook my belange; hulle geluk is ook my geluk. Dit is die oortuiging dat ons saam deel is van 'n gelukkige gemeenskap. Die mense wat hier woon, is ook my mense!

Uit eie keuse dra ek by tot ons almal se veiligheid, netheid, ordelikheid, bewaring en gesondheid. Ek respekteer almal, ook hulle wat anders dink en leef as ek. Ek gee om vir almal, ook hulle wat swaar kry, arm is, gestrem is of nie werk het nie.

Verantwoordelike mense stry spontaan teen korrupsie, lewer flinke diens, praat die waarheid en lewer billike kritiek. Kortom, 'n gemeenskap met verantwoordelike mense blom. Ons kan dit in Hermanus regkry want ons het wonderlike mense, 'n pragtige omgewing, eerbare leiers, goeie infrastruktuur en toegewyde geloofsgemeenskappe. Elkeen moet verantwoordelikheid te aanvaar vir die klein deeltjie waar hy of sy 'n verskil kan maak. Dink solank waar jôu deeltjie inpas, en doen dit!

Mag Kersfees vir ons gemeenskap vol seëninge wees.

- Wilhelm Burger

NUWE ERA BREEK VIR STORTINGSTERREIN AAN

Gansbaai se nuwe stortingsterrein, wat teen 'n koste van R11,5 miljoen ontwikkel is, word op 1 Desember vanjaar amptelik in bedryf gestel.

Benewens die ontwikkeling van 'n sel wat aan die wetlike vereistes vir die storting van vaste afval voldoen, beskik die terrein nou ook oor 'n weegbrug, 'n stoor vir herwinning en kantoorfasiliteite en is die landskap só uitgeleë dat dit die voorkoms daarvan versag.

Dit verander egter ook vullisstorting in hierdie gemeenskap onherroeplik. Onder die verreikende implikasies wat dit inhou, is die volgende:

- 'n Privaatfirma wat oor die nodige kundigheid en opgeleide personeel beskik, sal voortaan die terrein bestuur.
- Toegang sal beheer word. Mense of instansies wat rommel of tuinafval wil stort, sal eers 'n permit by die munisipale kantore moet uitneem voor hulle toegang tot die terrein kan verkry.
- Die voorgeskrewe fooie sal van toepassing wees. In die geval van huis-eienaars wat in hul persoonlike kapasiteit tuinvullis wil stort, is die permit gratis, maar eienaars van onontwikkelde erwe sal moet betaal omdat hulle slegs vir beskikbaarheid op hul rekeninge gehew word. Plaaseienaars sal ook moet be-

taal omdat hul belasting en dienste-gelde nie vullisverwydering insluit nie. Die storting van fyn en skoon bourommel wat vir die bedekking van vullis aangewend kan word, is ook gratis. Tuindienste kan blare en grassnyls gratis stort maar sal moet betaal vir takke omdat dit opgekerf word.

- Storting van bourommel en ander afval op enige ander plek as die stortings-terrein is onwettig en daar sal sterk teen oortreders opgetree word.
- Geen gevaarhoudende stowwe sal aanvaar word nie. Dit sal op eie koste na die Vissershok-stortingsterrein by Kaapstad geneem moet word aangesien dit die enigste terrein is wat tans sulke stowwe kan hanteer.
- Die munisipale projek om herwinning vanaf bron te bevorder, sal eersdaags na Gansbaai en Stanford uitgebrei word. Dit sal met 'n omvattende inligtingsveldtog gepaard gaan maar kom in kort daarop neer dat herwinbare vullis uitgeplaas moet word in 'n deursigtige plastieksak wat aan inwoners voorsien sal word. Besighede en plaasbewoners kan ook deelneem en sal herwinningsake gratis by die stortingsterrein kan aflaai. Hoe meer herwinning geskied, hoe langer sal die lewensduur van die terrein wees.



KLASSIEKE WERKE OP VERHOOG



Jerome Pernod (tjello) en Jerome Ducros (klavier) voer op Sondag, 14 November om 15:30 werke van Beethoven, Piazzola en Brahms in die auditorium van die Overstrand-burgersentrum in Hermanus op. Overstrand Kunstse aanbiedings in Desember sluit in 'n voorlesing deur Wilna Snyman van Emily Hobhouse se *Dear Mrs Steyn* op Sondag die 5de om 15:30 en 'n Kersprogram deur die orrelis Barry Smith en 'n Kaapse koor op Donderdag die 16de om 19:00. Kaartjies kos R80 en R40 vir studente. Bespreek by BELLINI by 028 312 4988 of rig navrae aan René du Plooy by 082 940 4238.

GEMEENSAPSPOLISIEFORUM



Help Bettysbaai met Buurtwag

Bettysbaai se Belastingbetalersvereniging (<http://bettysbay.info/>) het besluit om die polisie by te staan om 'n Buurtwag te vorm. Ons wil graag 'n veilige omgewing vir ons gesinne en eiendom skep deur die gemeenskap aan te spoor om saam te werk om misdaad te beveg.

Hiervoor benodig ons 'n databasis met besonderhede van al Bettysbaai se inwoners sodat ons u in enige krisis-toestand soos brande, misdaad, ensovoorts ten volle ingelig kan hou vir blitssnelle optrede.

Help ons asseblief deur u NAAM en ERFNOMMER per e-pos te stuur aan ons voorsitter, Dan Fick, by dfick@mweb.co.za of skakel hom by 028 272 9800 en staan 'n kans om 'n groot prys te wen!

Spring in en bevry Bettysbaai van misdadigers!!